

## **REZOLUTË**

### **PËR INTEGRIMIN EUROPIAN TË SHQIPËRISË**

**Duke rikonfirmuar** vullnetin e Kuvendit të Shqipërisë se procesi i integrimit evropian përbën objektivin madhor politik për Shqipërinë dhe shqiptarët;

**Duke vlerësuar** progresin e madh dhe të padiskutueshëm të Republikës së Shqipërisë në kontekstin e proceseve reformuese dhe përparimet në rrugën e integrimit evropian, konsolidimin e shoqërisë demokratike, shtetit të së drejtës, luftës ndaj krimit të organizuar dhe korrupsionit, të cilat sigurojnë një zhvillim të qëndrueshëm demokratik të vendit;

**Duke vlerësuar** se Republika e Shqipërisë është një demokraci funksionale, sipas standardeve dhe praktikave evropiane dhe, ndër vite, ajo ka bërë progres në përmbushjen e kriterëve që kanë të bëjnë me stabilitetin e institucioneve që garantojnë demokracinë, shtetit të së drejtës, të drejtave të njeriut dhe respektimit e mbrojtjes së të drejtave të minoriteteve, të njohura si kriteret e Kopenhagenit, 1993 dhe, njëkohësisht, edhe kriteret e procesit të stabilizim-asocimit;

**Duke ritheksuar** se, në kontekstin e integrimit evropian të Shqipërisë, zgjedhjet e 28 qershorit 2009 përbëjnë një sukses të qenësishëm për Shqipërinë, të cilat përmbushën shumicën e standardeve ndërkombëtare në fushën e zgjedhjeve dhe janë vlerësuar si të tilla nga raporti përfundimtar i OSCE/ODIHR-it;

**Duke vlerësuar** se liberalizmi i vizave përbën një arritje historike për shtetin dhe popullin shqiptar, që u mbështet në proceset e suksesshme, të gjithanshme, reformuese të shtetit shqiptar, si dhe duke shprehur mirënjohjen ndaj vendeve të Bashkimit Evropian për gatishmërinë dhe vlerësimin e bërë;

**Duke vlerësuar** zhvillimin e shpejtë të ekonomisë së tregut në Shqipëri, reformën rregullatore për sigurimin e një klime sa më miqësore dhe favorizuese ndaj biznesit, luftën ndaj monopoleve dhe reduktimin e ekonomisë informale, transparencën dhe luftën ndaj korrupsionit, rritjen e performancës së administratës tatimore dhe zhvillimin e fuqishëm të investimeve të huaja në Shqipëri;

**Duke vlerësuar** maksimalisht konsensusin e gjerë mes forcave politike për destinacionin evropian të Shqipërisë, si dhe mbështetjen e gjerë popullore në vend për integrimin evropian;

**Duke mbështetur** rolin e Republikës së Shqipërisë në konsolidimin e bashkëpunimit rajonal, rolin konstruktiv dhe promotor në politikat rajonale të bashkëpunimit dhe fqinjësisë së mirë dhe më gjerë;

#### **Kuvendi i Republikës së Shqipërisë:**

1. **Çmon se** opinioni i Komisionit Evropian dhe Raporti Analitik, 2010 i Komisionit Evropian duhet të përbëjë programin e punës për çdo institucion në Republikën e Shqipërisë dhe duhet të përkthehet në objektiva konkrete dhe të prekshëm për përmirësimin e punës dhe performancës së çdo institucioni, për të sjellë në një stad të ri rrugën e zhvillimit dhe të integrimit evropian të Shqipërisë.

- Komisionet e përhershme të Kuvendit, në vlerësimin e punës vjetore të institucioneve të pavarura, duhet të zhvillojnë debat të zgjeruar për performancën e tyre, në raport me konstatimet e Raportit Analitik dhe, në programimin e objektivave të punës për vitin 2011, të reflektojnë kërkesat e paraqitura në raport;

- Kalendarin e objektivave të punës së çdo institucioni, i hartuar sipas pikës 1, duhet të bëhet publik dhe opinioni publik duhet të informohet për veprimet e ndërmarra nga çdo institucion në përmbushjen e tij.

2. **Gjykon se** mosfunksionimi normal i raportit pozitë-opozitë dëmton mbarëvajtjen dhe ushtrimin e plotë të kompetencave kushtetuese të Kuvendit. Në mënyrë të veçantë, bojkoti dhe braktisja e debateve, mbledhjeve dhe votimeve në Kuvend penalizon realizimin e objektivave dhe zvarrit proceset integruese dhe evropianizuese të vendit. Për pasojë, Kuvendi bën thirrje për ndryshimin rrënjësor të këtyre praktikave të dëmshme dhe joproduktive.

3. **Për të nxitur dhe konsoliduar** frymën e bashkëpunimit dhe kompromisit të

qëndrueshëm shumicë-opozitë, Kuvendi i bën thirrje opozitës parlamentare të mbajë përgjegjësitë e kohës europiane për Shqipërinë, duke vendosur interesat kombëtarë mbi ata partiakë, për:

- Miratimin në një kohë sa më të shpejtë, të ndryshimeve të Kodit Zgjedhor, në përputhje me rekomandimet e OSBE/ODIHR-it;

- Realizimin e zgjedhjeve të ardhshme vendore, në përputhje me standardet europiane dhe ato ndërkombëtare;

- Zgjedhjen sa më shpejt të Avokatit të Popullit në Kuvend;

- Votimin e ligjeve që kërkojnë një shumicë të cilësuar në Kuvend;

- Marrjen e masave të nevojshme legjislative për të kufizuar numrin e organeve që kanë imunitet dhe kufizimin e aplikimit të imunitetit për zyrtarët e lartë shtetërorë.

#### **4. Nxiti, mbështet dhe kërkon:**

- Intensifikimin e përpjekjeve legjislative, buxhetore, administrative dhe institucionale, si një prioritet strategjik, për të fituar besimin e publikut në sistemin e drejtësisë, nëpërmjet një drejtësie të pavarur, transparente, të përgjegjshme dhe eficiente. Strategjia e reformës në drejtësi të përfundojë në një afat sa më të shkurtër dhe të shërbejë si baza solide e konsolidimit dhe harmonizimit të përpjekjeve të përbashkëta, për të mundur një drejtësi të standardeve europiane në Shqipëri. Strategjia të shërbejë dhe të realizojë reformimin e sistemit në dy shtylla kryesore: pavarësinë dhe përgjegjshmërinë e tij;

- Hyrjen në një fazë të re të luftës ndaj krimit të organizuar dhe korrupsionit, duke implementuar me saktësi dhe profesionalizëm bazën e re legjislative në këtë fushë dhe duke rritur bashkëpunimin polici-prokurori-gjyqësor, për të përmbushur këtë objektiv të përbashkët dhe themelor për një shoqëri demokratike;

- Paraqitjen sa më shpejt të amendamenteve të ligjit “Statusi i nëpunësit civil”, me synim konsolidimin e një administrate civile profesionale, të aftë të përballojë zhvillimet e vendit dhe të konsolidojë rolin e saj si një aset i çmuar i organizimit shtetëror të Shqipërisë;

- Miratimin mbi ekspertizën profesionale dhe të një konsultimi të gjerë të strategjisë për të drejtat e pronësisë në Shqipëri, e cila duhet të përfshijë edhe zbatimin në të drejtën e brendshme, në kuptimin legjislativ të vendimeve të Gjykatës së Strasburgut me palë Republikën e Shqipërisë, por edhe në përgjithësi jurisprudencën e kësaj Gjykate për të drejtat e pronësisë;

- Marrjen e masave konkrete dhe të gjithanshme, nga çdo aktor dhe autoritet, për mbrojtjen adekuate të të drejtave dhe lirive të njeriut, përfshirë trajtimin e të burgosurve dhe të paraburgosurve, të grave, të të miturve, luftë efektive dhe më cilësore për dhunën në familje, me theks të veçantë në parandalimin e saj, si dhe zbatimin e plotë të legjislacionit të detajuar për antidiskriminimin.

27 dhjetor 2010

KRYETARE  
**Jozefina Topalli (Çoba)**